

ZUDE **ka letere min sebe** **Kitabu faamucogo**

Zude le ye nin letere sebebaga ye; Yakuba balemace lo, Yakuba min tun kera Zeruzalemu lanabagaw namogo ye. Zude ni Yakuba bee ye Yesu balemacew le ye (Matiyu 13.55).

Nin letere ma sebe jenkuru kelen togo ra; a cira lanabagaw bee le ma. Zude ko: «Fa Ala ka aw minw wele ka aw kanu a ta jengogonya ra, ka aw mara Yesu Kirisita ye, ne be nin sebe cira aw le ma.»

Nin kitabu sebecogo ni Piyeri ta kitabu flanan sebecogo bora jogon fe. Yoro caman bora jogon fe, i n'a fo Zude 18 ani Piyeri flanan 3.3; o yoro fla be kuma kelen le fo.

An b'a ye fana ko nin letere be seko ce do ta kumaw kan, min ye Enoki ye (14-15). I b'a soro ko o wagati ta mogow tun ka o ce lon.

Zude ta kitabu ka surun; sura kelen doron lo. Nka Zude b'a fe lanabagaw ye o yere korosi karamogo faninyafobagaw ra, minw be mogow ta lanaya cen ni o ta karan ye, ka mogow bla sirajuguw kan. A ko, ko Ala bena kiti ben o karamogow kan.

Lanabaga minw baraka ka dogo, tow ka kan ka olugu demedeme, nka bee ka kan k'a yere korosi, janko do kana ke sababu ye ka do laben.

Kitabu konokow

Kitabu daminakumaw (1-2)

Karamogo faninyafobagaw ta kiti (3-16)

Lanabagaw ka kan ka kanuya sira tagama (17-23)
Ala ka kan ni bonya ni tandori ye (24-25)

Zude ta fori

¹ Ne Zude, ne min ye Yesu Kirisita ta baaraden ye, ani Yakuba balemace, ne be nin sebe ci Ala ta mogo weleninw ma, Fa Ala ka minw kanu a ta jengogonya ra, ka o mara Yesu Kirisita ye.

² Ala ye hina ni hera ni kanuya di aw ma k'a caya.

*Karamogo faninyafobagaw
(Piyeri flanan 2.1-22; 3.1-3)*

³ Ne balema kanuninw, ne tun b'a fe yere le ka sebe ci aw ma kisiri ko ra, kisiri min kera an be ta ye. Ne k'a ye ko jagboya lo ko ne ye nin sebe ci aw ma ka aw ja gbeleya, janko aw ye jija lanaya ra, Ala ka o lanaya min di a ta mogo saninmanw ma sijaga kelenpe, ka dan o ma.

⁴ Ayiwa, mogo dow dogora ka don aw ce ra; o mogow halakiko sebera kabini wagatijan. Alapasiranbari dow lo; o be an ta Ala ta nema ta ko yelma ka o ke marobariyako ye. Kuntigi kelen, ani Matigi kelen min be an fe, Yesu Kirisita, o be ban o ra.

⁵ Ayiwa, ne bena min fo, hali ni aw dow ka o lon ka ban, ne belen be aw hakiri jigi a ra, ko an Matigi Ala ka Izirayelimogow kisi ka o bo jonya ra Misiran; nka minw kera lanabariw ye o ra, a ka olugu halaki.

⁶ O ko, meleke minw bora o loyoro ra, ani o ma son ka to o sigiyoro ra, Ala ka olugu don

negejorokow ra, negejoroko min te bo o ra ka ye, ka o bla dibi ra ka kiti lon makono.

⁷ O ko tuun, Sodomu ni Gomori ni o kerɛfeduguw, o duguw ta mɔgow fana ka o yere bla jatoya ra, ka taga a ke fo cew be jɔgon jini. O koson Ala ka tasma fagabari jigi o mɔgow kan; o kera k'a yira an na, janko ka an lasomi.

⁸ Nka o beɛ n'a ta, o mɔgow be o kewale kelenw le ke; o be ta o ta miiriyakolonw fe ka o farikolo lanogo, ka ban Matigi ta kuntigiya ma, ka sankolo danfen nooromanw neni. ⁹ K'a soro hali melekew kuntigiba Mikayilu, wagati min ale ni Setana tun be jɔgon sosora cira Musa su koson, a ma son ka kumakolon fo Setana ma. A ko a ma le doron ko: «Matigi Ala ye i sara.»

¹⁰ Nka o karamogow koni, olugu te ko minw lon, o be kumakolon fo o ma. K'a soro o ka ko minw lon o yere ma, i n'a fo began hakirintanw, o le be ke sababu ye ka o halaki. ¹¹ Bonɔ bena o soro, sabu o ka Kabila* ta sira le ta. Wari koson o ka o yere lafiri i ko Balamu. O halakira, sabu o murutira i ko Kore tun murutira cogo min na. ¹² O mɔgow be ke aw togocensababu le ye aw ta balemaya domuniw na; o be janagbe ke ni aw ye, ka domuni ke, ka min ka o konɔ fa, hali o te maroya. O be i ko sankaba min be fin, nka a te sanji ben; fono b'a ce ka taga ni a ye. O be i ko yiri minw te den hali o dentuma ra, i ko yiri minw bonna ni o liliw ye, o sanin lo fo sinagako fla. ¹³ O be o ta marobariyakow ke kene kan i ko kogoji jikurubaw be jikanga nogoninw seri kene

* **1:11** 1.11 Kabila: Dow b'a fo ko Kayen.

ma cogo min na. O be i ko lolo minw be yaala ka lamini; dibifinba banbari le be o makɔnɔna yi.

¹⁴ Adama ta mamaden wolonflanan min tɔgɔ ye ko Enɔki†, ale ka ciraya ke o mɔgɔw ta ko le ra, ko: «Matigi Ala bena na ni a ta meleke saninman caman ye, ¹⁵ ka na mɔgɔw beɛ ta kiti tige, ka kiti ben Alapasiranbariw beɛ kan o ta Alapasiranbariyakow beɛ kosɔn, ani o jurumunkebagaw ka Alapasiranbariyakuma min o min fo Ala ma.» ¹⁶ O mɔgɔw ta kuma misenw ka ca, mɔgɔ wasabariw lo; o be tagama ka kapa ni o yere ta negejuguw le ye. O be dabayakumaw fo ka waso, ka mɔgɔw nege o yere ta nafa kosɔn.

Lanabaga ka kan ka baara min ke

¹⁷ Nka aw kɔni, ne balema kanuninw, an Matigi Yesu Kirisita ta ciradenw* tun kɔnna ka kuma minw fo folɔfoɔ, aw ye aw hakiri to o ra. ¹⁸ O tun b'a fora aw ye ko: «Dunɔpa laban wagatiw ra, kumakolonfɔbaga dɔw bena na; o bena tagama Alapasiranbariya ra ka kapa ni o yere sago ye.» ¹⁹ Ayiwa, a mɔgɔw le ye nin ye; olugu le be lanabagaw faran, o be tagama ka kapa ni o yere jogo le ye; Nin Saninman* te o fe.

²⁰ Nka aw kɔni, ne balema kanuninw, aw ye jija ka baraka don aw yere ra, ka to aw ta lanaya saninman kan, ka to ka Ala daari Nin Saninman baraka ra. ²¹ Aw ye to Ala ta kanuya ra, ka an Matigi Yesu Kirisita ta makari wagati makɔnɔ, janko a ye na panamanya banbari di aw ma.

† 1:14 1.14 Enɔki: Dɔw b'a fo ale le ma ko Idirisa.

²² Ayiwa, sigiya be minw na, aw ye makari olugu ra; ²³ aw ye dow sama ka bo tasuma ra ka o kisi. Aw ye makari dow ra, nka aw ye siran fana; hali o ta derege min lanogora jurumun fe, aw ye o koninya.

Ala tandori

²⁴ Ala le be se ka aw tanga, janko aw kana ben, ani janko aw ye lo a ta nooro na koro, jarakiyoro kana ke aw ra, ani aw ninsondiyaninba.

²⁵ Ayiwa, bonya, ani masaya, ani sebgaya, ani fanga, o bee ye an kisibaga Ala kelenpe ta le ye, kabini dununa ma dan, ani sisan, ani wagati bee, an Matigi Yesu Kirisita baraka ra. Amina.

Biblu Ala ta Kuma
Jula: Biblu Ala ta Kuma Bible

copyright © 2013 Wycliffe Bible Translators, Inc.

Language: Julakan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

0c9588de-99ac-53f9-aa9b-6885106dcde8